

Útihreyfingin
Melhagi 1
107 Reykjavík

Reykjavík, 24. október 2024
UST202410-132/S.V.
09.04.00

Efni: Leyfi til viðburðahalds í Kerlingarfjöllum

Umhverfisstofnun hefur móttengið umsókn Brynhildar Kristínar Ólafsdóttur, f.h. Útihreyfingarinnar, dagsetta 15. október 2024, um leyfi til að halda hlaupaviðburð, Kerlingarfjöll Ultra: Fjallahlaup, innan landslagsverndarsvæðisins Kerlingarfjöll.

Kerlingarfjöll eru friðlýst sem landslagsverndarsvæði sbr. [auglýsing nr. 822/2020](#). Óheimilt er að valda spjöllum á landslagi svæðisins. Allt rask á jarðminjum er óheimilt innan verndarsvæðisins, nema með sérstöku leyfi. Óheimilt er að raska hverum og öðrum uppsprettum á svæðinu. Óheimilt er að hafa áhrif á lífríki sem tengist hverum og öðrum heitum uppsprettum nema með leyfi. Afla skal leyfis Umhverfisstofnunar vegna skipulagðra viðburða og verkefna sem kalla á aðstöðu, mannafla eða meðferð tækja innan verndarsvæðisins, s.s. vegna kvikmyndagerðar, listviðburða og samkomuhalds.

Lýsing verkefnis:

Umsóknin snýr að leyfi til að halda Ultra fjallahlaup innan verndarsvæðisins í Kerlingarfjöllum laugardaginn 26. júlí 2025. Um er að ræða 3 hlaupaleiðir 12 km, 22 km, og 58 km. Kort sem sýnir hlaupaleiðirnar og staðsetningu drykkjastöðva fylgdi með umsókn. Gert er ráð fyrir að settar verði upp 5 drykkjarstöðvar á leiðunum, við Hveradali, Setursveg, Kisubotnaskála, Klakkskála og skarðið milli Skeljafells og Kerlingartinds. Þar verður útileguborðum komið fyrir með vatnskönnum og - belgjum en skilyrt verður að allir þátttakendur beri með sér fjölnota drykkjarílát. Hlaupið verður réttsælis eftir öllum hlaupaleiðum, sem merktar verða með litlum flöggum á járnpinnum sem er stungið ofan í svörðin. Áætlað er að leiðirnar verði merktar deginum áður (fer eftir veðurspá) og hreinsaðar upp strax og síðustu hlaupararnir hafa farið leiðirnar. Upphafs og endapunktur hlaupsins yrði öðru hvoru megin við brúnna yfir Áskarðsá fyrir neðan hótelið. Þar mun verða komið fyrir tímatökubúnaði, flöggum og borðum með drykkjum og einhverri næringu. Sótt er um leyfi fyrir allt að 400 þátttakendum í hlaupinu, 100 í 12 km, 200 í 22 km og 100 í 58 km, og gert ráð fyrir að 30 starfsmönnum að starfsfólki hótelsins og björgunarsveitarfólki meðtöldu.

Til að minnka álag á umferð við hótél og þjónustusvæði er áætlað að rútum og bílum verði lagt við *Spítalann* og fólk gangi þaðan eftir skiltum inn að upphafs- og lokamarki hlaupanna.

Áhrifamat:

Mat umhverfisstofnunar er að viðburðurinn muni ekki hafa neikvæð áhrif á náttúrufar eða verndargildi svæðisins en líklegt að hann geti valdið tímabundinni truflun á upplifun annarra gesta vegna mikillar umferðar á vegum og auknum fjölda fólks innan verndarsvæðisins á meðan keppni stendur. Stofnunin telur að hægt sé að draga úr neikvæðum áhrifum viðburðarins sé farið eftir skilyrðum leyfisins.

Skilyrði:

Umhverfisstofnun veitir Útihreyfingunni fyrir sitt leyti leyfi fyrir hlaupaviðburði innan landslagsverndarsvæðisins Kerlingarfjalla sbr. lýsingu hér að ofan 26. júlí 2025 að uppfylltum eftirfarandi skilyrðum:

- Stjórnendur viðburðarins skili til Umhverfisstofnunar, a.m.k. viku áður en keppni hefst, áætlun um það hvernig staðið verði að framkvæmd keppinnar. Í áætlun skal m.a. koma fram, fjöldi þátttakenda, hvernig þátttakendum og starfsmönnum er komið á staðinn og hvernig staðið verði að frágangi að viðburði loknum.
- Umhverfisstofnun skal tilkynnt um öll frávik við áður útgefna verkefnalýsingu og eins ef breyting verður á tímasetningu verkefnis eins fljótt og auðið er.
- Skipulagi verði háttað þannig að mannskapur verði í Neðri-Hveradölum til að styðja við keppendur og hlífa viðkvæmri náttúru svæðisins.
- A.m.k. 3 dögum áður en keppnin hefst skal koma fyrir merkingum við upphaf og endastöð hlaupsins/keppnisleiðar þar sem gestir svæðisins eru upplýstir um fyrirhugað hlaup/keppnishald.
- Auglýsa skal hlaupið vel og upplýsa aðra gesti á svæðinu að um tímabundna truflun sé að ræða á hlaupaleiðum á meðan á hlaupinu stendur.
- Hámarksfjöldi þátttakenda í hlaupinu fari ekki yfir 400 manns.
- Óheimilt er að hlaupa utan vega og merktra stíga innan verndarsvæðisins.
- Stjórnendur hlaupsins/keppinnar gefi sig fram við landverði svæðisins og upplýsi þá um hvenær undirbúningur á svæðinu hefst og hvenær frágangi er lokið.
- Upplýsa skal ljósmyndara og aðra sem koma á svæðið til að fylgjast með keppninni að óheimilt sé að fara út fyrir göngustíga og vísa þeim á góða ljósmyndatökustaði í samráði við landverði.
- Aðstandendur viðburðarins tryggi að ekki verði skilinn eftir neinn úrgangur á víðavangi, hvorki á/við hlaupaleiðir né á drykkjastöð. Einnig að tryggt verði að merkingar sem notaðar verða við að merkja hlaupaleiðina verði fjarlægðar strax að viðburði loknum, farið yfir hlaupaleið og úrgangur sem keppendur hafa misst fjarlægður og skemmdir á gróðri, ef einhverjar verða, lagfærðar.
- Óheimilt er að aka utan vega og skulu starfsmenn sem koma að hlaupinu einungis aka eftir merktum vegum.
- Mælist er til þess að þátttakendur komi á svæðið í skipulögðum rútuferðum á vegum viðburðarins þar sem bílastæði eru takmörkuð og vegasamgöngur erfiðar.

- Þátttakendur taki tillit til annara gesta svæðisins hvort sem er við skála, þar sem drykkjarstöðvar eru staðsettar eða á þeim stígum sem viðburðurinn fer fram.
- Hafa skal þetta bréf með í för á meðan verkefninu stendur og kynna fyrir starfsfólki þau skilyrði sem fylgja leyfinu, áður en undirbúningur og vinna hefst.
- Virða skal umgengnisreglur sem gilda um svæðið.
- Losun ferðasalerna skal fara fram á viðurkenndum losunarstað utan hins friðlýsta svæðis.
- Ef upp koma álitamál um framkvæmdir sem tengjast verkefninu og frágang svæðisins skal hafa samband við Umhverfisstofnun í síma 591-2000.
- Drykkjarstöðvar skulu vera staðsettar á malarplönnum við skála þar sem engin hættu er á að viðkvæmur gróður skaðist. Á öðrum svæðum skal staðsetning drykkjarstöðva ákveðin í samráði við starfsmenn Umhverfisstofnunar sem fara með umsjón svæðisins. Vanda skal til við frágang drykkjarstöðva og afmá allt rask.

Ef framkvæmdaaðili veldur náttúruspjöllum með framkvæmd í skilningi 87. gr. laga nr. 60/2013 um náttúruvernd getur Umhverfisstofnun t.d. lagt fyrir leyfishafa að afmá jarðrask og lagfæra gróðurskemmdir eða stöðvað framkvæmdir sbr. nánar XV. kafla laganna.

Ef umhverfisaðstæður á svæðinu breytast getur Umhverfisstofnun skv. 2. mgr. 89. gr. laga nr. 60/2013 um náttúruvernd breytt skilyrðum leyfis, bætt inn nýjum skilyrðum eða afturkallað leyfið til að koma í veg fyrir verulegt, ófyrirséð tjón á náttúru Íslands.

Leyfi lögreglu, sveitarfélags og vegargerðarinnar gæti þurft fyrir verkefninu.

Sé skilyrðum leyfis ekki fullnægt getur Umhverfisstofnun afturkallað leyfið skv. 1. mgr. 89. gr. laga nr. 60/2013 um náttúruvernd.

Leyfisgjald:

Umhverfisstofnun innheimtir gjald fyrir vinnslu og afgreiðslu umsókna um leyfi á friðlýstum svæðum sbr. 1. mgr. 92. gr. laga nr. 60/2013 um náttúruvernd. Gjald fyrir umsókn um starfsemi, viðburði, rannsóknir og athafnir er kr. 62.400. sbr. 29. gr. a. gjaldskrá Umhverfisstofnunar nr. 1410/2023.

Eftirlit:

Umhverfisstofnun mun hafa eftirlit með framkvæmdum og frágangi á svæðinu. Eftirlitið verður framkvæmt af eftirlitsmanni frá Umhverfisstofnun.

Virðingarfyllt

Valdimar Kristjánsson
svæðissérfræðingur

Sigrún Valgarðsdóttir
sérfræðingur